

Fundisho La Wanikolai

na

Kasisi William Marrion Branham

Fundisho La Wanikolai

Ufunuo 2:15, "Vivyo hivyo na wewe nawe una watu wayashikao mafundisho ya Wanikolai, ambayo ninayachukia vile vile."

Utakumbuka ya kwamba nilieleza katika Wakati wa Efeso kuwa lile neno, *Nikolai*, latoka kwenye maneno mawili ya Kiyunani: *Nikao ambalo linamaanisha kushinda*, na *Lao ambalo linamaanisha washiriki*. Nikolai maana yake ni, "kushinda washiriki." Basi kwa nini hili ni jambo la kutisha mno? Linatisha mno kwa sababu Mungu hajaliweka kamwe kanisa Lake mikononi mwa viongozi waliochaguliwa wanaoenenda kwa mawazo ya kisiasa. Ameliweka kanisa Lake katika ulinzi wa watu waliochaguliwa na Mungu, waliojazwa Roho, watu wanaoishi katika Neno wanaowaongoza watu kwa kuwalisha Neno. Yeye hajawatenganisha watu katika madaraja ili umati uongozwe na ukasisi mtakatifu. Ni kweli kwamba uongozi lazima uwe mtakatifu, lakini hivyo ndivyo inapasa washiriki wote wawe. Isitoshe, hakuna mahali katika Neno ambapo makasisi wala wahudumu wala watu wa namna hiyo hupatanisha kati ya Mungu na watu, wala hakuna mahali ambapo wametengwa katika kumwabudu Bwana. Mungu anataka wote wampende na kumtumikia pamoja. Unikolai huharibu kanuni hizo na badala yake unawatenga wahudumu toka kwa watu na kuwafanya watawala badala ya watumishi. Basi hili fundisho kweli lilianza kama tendo katika wakati wa kwanza. Yaonekana kana kwamba shida ilikuwa katika maneno mawili: "wazee" (makasisi) na "wasimamizi" (maaskofu). Ingawa Maandiko yanaonyesha kwamba kuna wazee kadha katika kila kanisa, wengine walianza (mionganii mwao akiwemo Ignasio) kufundisha kuwa wazo la askofu lilikuwa kwamba ni mtu mkuu ama mwenye mamlaka na amri juu ya wazee. Sasa ukweli wa mambo ni neno "mzee" linaonyesha mtu huyo ni nani, ambapo

neno "askofu" linaonyesha huduma ya mtu yuyo huyo. Mzee ni huyo mtu mwenyewe. Askofu ni huduma ya huyo mtu. "Mzee" mara zote limekuwa na kila mara litakuwa likimaanisha bila shaka umri wa mtu katika Bwana. Yeye ni mzee, si kwa sababu amechaguliwa ama kuwekelewa mikono, nk., bali ni kwa sababu yeye ana umri mkuu ZAIDI. Yeye amekolea zaidi, amefundishwa, si mwanafunzi, bali anayetumainiwa kwa sababu ya ujuzi na uthabiti wa ujuzi wake wa Kikristo wa siku nyingi. Bali sivyo, maaskofu hawakushikilia nyaraka za Paulo, bali waliiendea taarifa ya Paulo ya wakati alipowaita wazee kutoka Efeso hadi Mileto katika Matendo 20. Katika kifungu cha 17 taarifa hiyo inasema, "wazee" waliipta na baadaye katika kifungu cha 28 wanaitwa wasimamizi (maaskofu). Nao hawa maaskofu, (bila shaka wakiwa na mawazo ya kisiasa na wenye shauku ya kutaka madaraka) walisisitiza ya kwamba Paulo alikuwa akimaanisha kuwa "wasimamizi" walikuwa zaidi ya mzee wa mtaa aliye na mamlaka rasmi katika kanisa lake mwenyewe tu. Kwao askofu alikuwa sasa mtu mwenye mamlaka juu ya viongozi wengi wa mahali pale. Wazo kama hilo halikuwa la Kimaandiko wala la kihistoria, hata hivyo mtu wa hadhi kama Polikapu aliegemea kwenye mwongozo kama huo. Kwa hiyo, lile lililoanza kama tendo katika wakati wa kwanza lilifanywa fundisho wazi na ndivyo liliyvo sasa. Maaskofu wangali wanadai mamlaka ya kuwaongoza watu na kuwashughulikia vile wapendavyo, wakiwaweka wao mahali wapendapo katika huduma. Jambo hili haliambatani na uongozi wa Roho Mtakatifu aliyesema, "Nitengeeni Paulo na Barnaba kwa kazi ile niliyowaitia." Hili linapingga Neno na ni pinga Kristo. Mathayo 20:25-28,"Lakini Yesu akawaita, akasema, Mwajua ya kuwa wakuu wa Mataifa huwatawala kwa nguvu, na wakubwa huwatumi kisha. Lakini haitakuwa hivyo kwenu; bali mtu ye yote anayetaka kuwa mkubwa kwenu, na awe mtumishi wenu; na mtu ye yote anayetaka kuwa wa kwanza kwenu, na awe mtumwa wenu; kama vile Mwana wa Adamu asivyokuja kutumikiwa, bali kutumika, na kutoa nafsi Yake iwe fidia ya

wengi." Mathayo 23:8-9, "Bali ninyi msiiitwe Rabi, maana Mwalimu wenu ni Mmoja, ndiye Kristo; nanyi nyote ni ndugu. Wala msimwite mtu baba duniani; maana Baba yenu ni Mmoja, Aliye wa mbinguni."

Ili kueleza hili wazi zaidi, hebu nieleze Unikolai kwa njia hii. Mnakumbuka kuwa katika Ufunuo 13:3 inasema, "Nikaona kimoja cha vichwa vyake kana kwamba kimetiwa jeraha la mauti, na pigo lake la mauti likapona. Dunia yote ikamstaajabia mnyama yule." Sasa twajua kwamba kichwa kilichojeruhiwa kilikuwa Milki ya kipagani ya Kirumi, ule utawala mkuu wa kisiasa ulimwenguni. Kichwa hiki kiliinuka tena kama "Milki ya kiroho ya Katoliki ya Kirumi." Basi chunguza hili kwa makini. Ni jambo gani ililofanya Rumi pagani ya kisiasa ambalo lilikuwa ndilo msingi wa mafanikio yake? Hiyo, "iligawanya na kushinda." Hiyo ndiyo iliyokuwa mbegu ya Rumi — gawanya upate kushinda. Meno yake ya chuma yalirarua na kuangamiza. Yule iliyemrarua na kumwangamiza hangeweza kuinuka tena kama vile ilivyouangamiza Carthage na kutapanya chumvi humo. Mbegu zile zile za chuma zilibaki ndani yake wakati ilipoinuka kama kanisa la uongo, na maongozi yake yangali yale yale — gawanya upate kushinda. Huo ni Unikolai na Mungu anauchukia.

Sasa ni jambo la kihistoria linalojulikana sana kwamba wakati kosa hili lilipopenya likaingia ndani ya kanisa, watu walianza kushindania huduma ya uaskofu hata ikawa kwamba cheo hiki kilikuwa kikipewa wenyewe elimu zaidi na waliofanikiwa kimali na wenyewe mawazo ya kisiasa. Maarifa ya wanadamu na mipango yao ikaanza kupachukua mahali pa hekima ya Mungu, na Roho Mtakatifu hakuwa tena anaongoza. Jambo hili bila shaka lilikuwa uovu wa kufisha, kwa kuwa maaskofu walianza kushikilia kuwa haihitajiki tena tabia safi ya Ukristo kuhudumu aidha Neno au kuendeleza utaratibu wa dini kanisani kwa kuwa jambo muhimu ni sakramenti na taratibu zake. Jambo hili liliachilia watu waovu (washawishi) wawararue kondoo.

Pamoja na mafundisho yaliyobuniwa na wanadamu ya kuwainua maaskofu hadi mahali ambapo hawakupewa katika Maandiko, hatua iliyofuata ilikuwa kutoa madaraja ambayo yalisababisha serikali ya kidini; kwa kuwa mara muda si muda palikuwepo na maaskofu wakuu juu ya maaskofu na makadinali juu ya maaskofu wakuu na kufikia wakati wa Bonifasio wa tatu palikuwepo na papa juu ya wote, Askofu Mkuu.

Huku yakiwemo mafundisho ya Wanikolai na muungano wa Ukristo na Ubabiloni matokeo halisi kwa jumla bila shaka yalikuwa yale Ezekieli alioona katika Sura ya 8:10, "Basi, nikaingia, nikaona; na tazama, kila namna ya wadudu, na wanyama wachukizao, na taswira za vinyago vyote vya nyumba ya Israeli, zimepigwa ukutani pande zote." Ufunuo 18:2, "Akalia kwa sauti kuu, akisema, Umeanguka, umeanguka Babeli ule mkuu; umekuwa maskani ya mashetani, na ngome ya kila roho mchafu, na ngome ya kila ndege mchafu mwenye kuchukiza, kwa kuwa mataifa yote wamekunywa mvinyo ya ghadhabu ya uasherati wake."

Basi fundisho hili la Wanikolai, sheria hii iliyoimarishwa katika kanisa haikukubalika vizuri sana kwa watu wengi kwa kuwa wangesoma waraka wa kipekee au insha juu ya Neno lililoandikwa na mtu anayemcha Mungu. Basi kanisa lilifanyaj? Liliwafukuza walimu wenye haki na kuyachoma moto magombo. Walisema, "Yahitaji elimu maalum kusoma na kulielewa Neno. Naam hata Petro alisema kwamba mambo mengi aliyoandika Paulo yalikuwa magumu kueleweka." Baada ya kuliondoa Neno kwa watu, muda si muda ikafikia mahali ambapo watu waliskia tu yale anayosema kasisi, na kufanya aliyowaambia. Waliyaita hayo Mungu na Neno Lake takatifu. Waliyatwaa mawazo na maisha ya watu na kuwafanya wao watumwa wa ukasisi mdhalimu.

Basi ukitaka thibitisho kuwa Kanisa Katoliki hudai maisha na mawazo ya watu, hebu sikiliza amri ya Theodosio wa X. *Amri ya Kwanza ya Theodosio.*

Amri hii ilitolewa mara tu alipobatizwa na Kanisa la Kwanza la Rumi. "Sisi watawala watatu tunaamuru ya kwamba raia wetu washike kwa uthabit dini iliyofundishwa na Mtakatifu Petro kwa Warumi, ambayo imehifadhiwa kwa uaminifu na mapokeo na ambayo sasa inatangazwa na askofu mkuu, Damasasi wa Rumi, na Petro, askofu wa Aleksandria, mtu mwenye utakatifu wa Kimitume kulingana na desturi za Mitume, na mafundinsho ya Injili; haya na tuamini Uungu mmoja wa Baba, Mwana, na Roho Mtakatifu, wenyewe utukufu ulio sawa katika Utatu Mtakatifu. *Tunaamuru ya kwamba wanaoishika imani hii waitwe Wakristo Wakatoliki; tunawabandika wafuasi wote wasio na akili wa dini zingine jina lenye sifa mbaya la wazushi, na kukataza mikutano yao ya nyumbani kuitwa kwa majina ya makanisa.* Mbali na hukumu ya haki ya kiungu, lazima ipatilizwe adhabu kali ambayo serikali yetu, ikiongozwa na hekima ya mbinguni itaamua wanastahili kupewa. . ."

Zile sheria za adhabu kumi na tano ambazo mtawala huyu alitoa katika miaka mingi kama hiyo ziliwanyang'anya wote waaminio Injili haki ya kuendeleza dini zao, ziliwaachisha kazi zote za serikali, na kuwatishia kwa faini, kuwanyang'anya mali zao, kuhamishwa na hata mara kwa mara, kifo.

Je, wajua? Tunaelekea moja kwa moja upande huo sasa.

Kanisa Katoliki la Kirumi hujiiita kanisa Mama. Linajiita kanisa la kwanza ama kanisa la asili. Hiyo ni kweli kabisa. Lilikuwa ndilo Kanisa asili la Kwanza la Rumi lilioanguka na kuingia dhambini. Lilikuwa la kwanza ambalo liliunda madhehebu. Ndani yake mlipatikana matendo na hatimaye mafundisho ya Unikolai. Hakuna atakayekana kuwa hilo ni mama. Hilo ni mama na limezaa mabinti. Basi binti hutokana na mwanamke. Mwanamke

aliyevaa vazi la rangi nyekundu ameketi juu ya milima saba ya Rumi. Yeye ni kahaba na amewazaa mabinti. Hao binti ni makanisa ya Kiprotestanti yaliyotoka kwalo kisha yakarudi katika madhehebu na Unikolai. Huyu Mama wa binti makanisa anaitwa kahaba. Huyo ni mwanamke asiyekuwa mwaminifu katika nadhiri yake ya ndoa. Aliolewa na Mungu naye akaenda kufanya uasherati na ibilisi na katika uasherati wake huo amezaa mabinti walio kama yeye kabisa. Muungano huu wa mama na binti ni upinga Neno, upinga Roho na hali kadhalika upinga Kristo. upinga. Naam, UPINGA KRISTO.

Basi kabla sijaendelea mbali sana ninataka kutaja kwamba hawa maaskofu wa mwanzoni walidhania ya kwamba wao hawakuwa chini ya Neno. Waliwaambia watu ya kwamba wao wangewasamehe dhambi zao mara wanapozikiri hizo dhambi. Hilo halikuwa kweli kamwe. Walianza kuwabatiza watoto wachanga katika karne ya pili. Hakika walifanya ubatizo wa kuzaliwa mara ya pili. Si ajabu watu wamechanganyikiwa siku hizi. Ikiwa walikuwa wamechanganyikiwa namna hiyo wakati huo, karibu sana na Pentekoste, sasa wako katika hali mbaya zaidi ya yote, wakiwa umbali wa yapata miaka 2,000 kutoka kwenye ile kweli ya asili.

Ewe, Kanisa la Mungu, kuna tumaini moja tu. Rudi kwenye Neno ukaishi nalo.text.

FUNDISHO LA BALAAMU

Ufunuo 2:14, "Unao huko watu washikao mafundisho ya Balaamu, ye ye aliyemfundisha Balaki atie ukwazo mbele ya wana wa Waisraeli, kwamba wavile vitu viliviyotolewa sadaka kwa sanamu, na kuzini."

Naam, huwezi kuanzisha mpango wa Wanikolai bila ya hili fundisho lingine kuijingiza, pia. Unaona, ukiliondoa Neno la Mungu na mwenendo wa roho kama njia ya kuabudia ("wao

wanaoniabudu Mimi yawapasa waniabudu katika Roho na kweli") basi itakulazimu uwape watu aina nyingine ya ibada kuwa badala yake, na badilisho huendeleza Ubalaamu.

Endapo tutafahamu fundisho la Balaamu ni nini katika kanisa la Agano Jipyä ni heri turudi nyuma tuone lilikuwa nini katika kanisa la Agano la Kale na kulitumia katika huo wakati wa tatu na halafu kulileta hadi siku hizi.

Hadithi hiyo inapatikana katika Hesabu Sura ya 22 hadi 25. Sasa tunajua kwamba Israeli walikuwa watu waliochaguliwa na Mungu. Walikuwa Wapentekoste wa siku zao. Walikuwa wamechukua kimbilio katika damu, wote walikuwa wamebatizwa katika Bahari Nyekundu nao wakatoka majini, wakiimba katika Roho na kucheza kwa nguvu za Roho Mtakatifu, huku Miriamu, nabii mke, anacheza tari. Naam, baada ya wakati fulani wa kusafiri, hawa wana wa Israeli walifikia Moabu. Mnakumbuka Moabu alikuwa ni nani. Yeye alikuwa mwana wa Lutu kwa mmoja wa mabinti wake, naye Lutu alikuwa mpwake Ibrahimu, kwa hiyo Israeli na Moabu walikuwa wa jamaa moja. Ninataka mlione hilo. Wamoabu waliujua ukweli, wautii wasiutii.

Kwa hiyo Israeli ikaja hadi mipakani mwa Moabu na wakatuma wajumbe kwa mfalme wakisema, "Sisi ni ndugu. Turuhusuni tupite katika nchi yenu. Kama watu wetu au wanyama wetu watakunyuwa ama kula cho chote, tutafurahi kukilipia." Lakini Mfalme Balaki alihangaika sana. Kiongozi huyo wa kundi hilo la Wanikolai hakuwa tayari kuacha kanisa lipite likiwa na ishara zake na maajabu na madhihirisho mbalimbali ya Roho Mtakatifu, huku nyuso zao zinang'aa kwa utukufu wa Mungu. Lilikuwa la hatari sana, kwa kuwa huenda akapoteza baadhi ya kundi lake. Kwa hiyo Balaki alikataa kuwaruhusu Israeli wapite. Kwa kweli, aliwaogopa sana, hata akamwendea nabii wa kukodiwa aliyeitwa Balaamu na akamwomba awe mpatanishi kati yake na Mungu amsihi Mwenyezi awalaani Israeli, na awadhoofishe. Naye Baalamu, akiwa na hamu ya kupata fungu katika mambo ya

kisiasa na kuwa mtu mkuu, alifurahia sana kufanya hivyo. Lakini alipoona ya kwamba ilimlazimu amwendee, na apate kusikiwa na Mungu kusudi hao watu wapate kulaaniwa, kwa kuwa hangeweza kufanya hivyo peke yake, ye ye aliondoka akaenda kumuuliza Mungu kama angemruhusu aende. Basi si hayo ni kama tu Wanikolai tulio nao siku hizi? Wao hulaani ye yote ambaye hangefuata njia zao.

Wakati Balaamu alipomwomba Mungu ruhusa ya kwenda, Mungu alimkataza. Jamani hilo lilimchoma! Lakini Balaki alisisitiza, akimwahidi hata zawadi kubwa zaidi na heshima. Kwa hiyo Balaamu akarudi kwa Mungu. Sasa jibu moja toka kwa Mungu lingetosha. Lakini sio kwa mkaidi Balaamu. Mungu alipoona ukaidi wake, alimwambi aondoche aende. Upesi sana akamtandika punda akaondoka akaenda zake. Yeye alipaswa kutambua ya kwamba haya yalikuwa tu mapenzi ya Mungu ya kuruhusu naye asingaliweza kuwalaani hata kama angeenda mara ishirini na kujaribu mara ishirini. Jinsi watu siku hizi walivyo kama Balaamu! Wanaamini katika miungu mitatu, wanabatizwa katika vyeo vitatu badala ya JINA, na hata hivyo Mungu atamtuma Roho juu yao kama vile alivyofanya juu ya Balaamu, nao wataendelea kuamini kuwa wao wako sahihi kabisa, nao kwa hakika wao ni Wabalaamu kabisa kwa vyo vyote vile. Unaona, fundisho la Balaamu. Endelea haidhuru. Fanya upendavyo. Wao husema, "Naam, Mungu ametubariki. Lazima liwe sahihi." Ninajua Yeye amewabariki. Silikatai hilo. Lakini ni njia ile ile ya kimadhehebu ambayo Balaamu aliipitia. Ni ya kuasi Neno la Mungu. Ni fundisho la uongo.

Kwa hiyo Balaamu alienda zake barabarani kwa ukaidi mpaka malaika aliyetoka kwa Mungu akasimama mbele zake. Lakini huyo nabii (askofu, kadinali, mwenyekiti, rais na msimamizi mkuu) alipofushwa sana katika mambo ya Rohoni na wazo la heshima na utukufu na pesa hata hangeweza kuona malaika mwenye upanga uliochomolewa. Huyo hapo amesimama

amzuie nabii mwenye kichaa, Maskini yule punda alimwona na akakwepa nyuma na mbele hadi mwishowe akaubana mguu wa Balaamu kwenye ukuta wa mawe. Yule punda alisimama akakataa kusonga mbele. Hangeweza. Kwa hiyo Balaamu aliruka chini na kuanza kumpiga. Basi punda akaanza kumzungumzia Balaamu. Mungu alimwezesha punda huyo kunena katika lugha. Punda huyo hakuwa mzao wa mchanganyiko; alikuwa mzao wa asili. Akamwambia nabii aliyepofushwa, "Je, mimi si punda wako, nami, je, sijakubeba wewe kwa uaminifu?" Balaamu akamjibu, "Ndiyo, ndiyo, wewe u punda wangu nawe umenibeba kwa uaminifu hadi sasa; na ikiwa siwezi kukufanya uende, nitakuua... salale! kitu gani hiki, kuzungumza na punda? Ajabu hiyo, nilifikiri nilimsikia punda akizungumza nami nilikuwa nikimjibu."

Mungu daima amenena katika lugha. Alinena katika karamu ya Belishaza na tena hapo Pentekoste. Anafanya hivyo tena siku hizi. Ni onyo la hukumu inayokaribia.

Basi huyo malaika akafanya aonekane waziwazi kwa Balaamu. Naye akamwambia Balaamu kama si punda yeye angekuwa amekufa hata sasa kwa kumjaribu Mungu. Lakini Balaamu alipoahidi kurudi, alitumwa aende huku ameonywa aseme yale tu Mungu aliyompa.

Kwa hiyo Balaamu alishuka akaenda akatengeneza madhabahu saba kwa ajili ya sadaka ya wanyama safi. Yeye alimchinja kondoo dume akionyesha kuja kwa Masihi. Yeye alijua la kufanya apate kumkaribia Mungu. Mitambo yake ilikuwa sawa; bali sio nguvu za kuiendesha; ndivyo ilivyo sasa. Huwezi kuuona Unikolai? Kule chini bondeni walikuweko Israeli wakitoa dhabihu ile ile, wakifanya mambo yale yale lakini ni mmoja tu aliyekuwa na ishara zilizofuata. Ni moja tu liliyekuwa na Mungu kati yalo. Utaratibu hautakufikisha po pote. Hauwezi kupachukua mahali pa udhihirisho wa Roho. Jambo hilo ndilo lililotukia kule Nikea. Waliyachukua mafundisho ya Balaamu, siyo mafundisho ya

Mungu. Nao wakakwazika; naam wakaanguka. Wakawa watu wafu.

Baada ya kutolewa kwa dhabihu, Balaamu alikuwa tayari kutabiri. Lakini Mungu akaufunga ulimi wake naye hangeweza kuwalaani. Aliwabariki.

Balaki alikasirika sana, lakini hapakuwapo na cho chote ambacho Balaamu angefanya kuhusu huo unabii. Ulikuwa umenenwa na Roho Mtakatifu. Kwa hiyo Balaki akamwambia Balaamu ashuke chini, aende katika lile bonde, akachunguze upande wao wa nyuma aone kama kuna uwezekano wa kuwalaani kwa njia fulani. Mbinu alizotumia Balaki ndizo wanazotumia siku hizi. Madhehebu makubwa hudharau vikundi vidogo, na cho chote wanachopata kati yao kiwezacho kusababisha kashifa, wao hukitoa nje na kikitangaza. Kama watu wa kisasa wakiishi katika dhambi, hakuna anayesema neno juu yake; bali hebu mmoja wa wateule aingie katika shida na kila gazeti litaieneza kote nchini. Naam, Israeli walikuwa na fungu la udhaifu wake(kimwili). Hao walikuwa na upande wao usio mwema; bali licha ya udhaifu wao, kwa kusudi la Mungu ambalo hufanya kazi kwa uchaguzi, kwa neema wala sio kwa matendo, WALIKUWA NA WINGU MCHANA NA NGUZO YA MOTO USIKU, WALIKUWA NA MWAMBA ULIOPIGWA, NYOKA WA SHABA NA ISHARA NA MAAJABU. Wao walithibitishwa — si katika nafsi zao, bali katika Mungu.

Mungu hakuwa na upendeleo wo wote kwa hao Wanikolai na PHD zao, LLD na DD zao na madhehebu yao mazuri na mambo bora sana ambayo mwanadamu angejivunia; bali Yeye aliwaheshimu Israeli kwa kuwa walikuwa na Neno lillothibitishwa kati yao. Hakika Israeli haikuonekana kuwa watu walioadibishwa sana, huku ndiyo kwanza watoke Misri kwa haraka, lakini walikuwa watu waliobarikiwa haidhuru. Kile walichokuwa wamewahi kujua kwa zaidi ya miaka mia tatu ni kuchunga kondoo, kulima mashamba na kufanya kazi ya utumwa huku

wana hofu ya mauti chini ya Warnisri. Lakini walikuwa huru sasa. Walikuwa watu waliobarikiwa kwa mamlaka ya Mungu. Bila shaka Moabu waliwadharau. Mataifa mengine yote yalifanya hivyo, pia. Madhehebu daima huwadharau wasio na madhehebu na aidha watawashurutisha wajunge na madhehebu ama watawaangamiza wasipokuja.

Basi mtu fulani huenda akaniuliza, "Ndugu Branham, ni nini kinachokufanya ufkirie kuwa Moabu walikuwa wa kimadhehebu bali Israeli hawakuwa hivyo? Unalipata wapi wazo hilo?" Ninalipata papa hapa katika Biblia. Lote limefananishwa hapa. Kila kilichoandikwa katika Agano la Kale kilicho katika hadithi kiliandikwa kwa maonyo yetu ili tuweze kujifunza kwake. Hili papa hapa katika Hesabu 23:9, "Kutoka kilele cha majabali namwona, na kutoka milimani namtazama; angalia, ni watu wakaao PEKE YAO, wala HAWATAHESABIWA PAMOJA NA MATAIFA." Hilo hapo. Mungu akiangalia chini kutoka kwenye kilele cha majabali, si kutoka kwenye bonde fulani akiyaangalia mabaya yao na kuwahukumu. Mungu akiwaona jinsi alivyotaka kwaona—kutoka kwenye kilele cha upendo na neema. Waliishi PEKE YAO na hawakuwa na madhehebu. Hawakuwa na mfalme. Walikuwa na nabii, naye nabii alikuwa na Mungu ndani yake kwa Roho; nalo Neno lilimjia nabii na hilo Neno likawaendea watu. Hawakuwa washiriki wa U.M. Hawakuwa katika Baraza la Makanisa Ulimwenguni, wala kwa Wabatisti, Wapresbiteri, Assemblies of God wala kundi lingine lo lote. Hawakuwa na haja ya kuwa washiriki. Walikuwa wameunganishwa na Mungu. Hawakuhitaji shauri kutoka kwa hal mashauri yo yote—walikuwa na "Bwana asema hivi" kati yao. Haleluya!

Basi licha ya ukweli kwamba Balaamu alijua njia iliyo sawa ya kumkaribia Mungu na angeweza kuleta ufunuo toka kwa Bwana kwa kukirimiwa kipawa maalum cha nguvu, ye ye ali kuwa angali bado, licha ya hayo yote, askofu katika kundi la uongo. Kwa kuwa alifanya nini sasa ili apate kujipendekeza kwa Balaki?

Alibuni mpango ambapo Mungu angelazimika kushughulikia Israeli katika mauti. Kama tu vile Shetani alivyojua kuwa angemdanganya Hawa (kumfanya aanguke kwa dhambi ya kimwili) na hivyo basi akamfanya Mungu amhukumu kwa hukumu Yake aliyoitangaza ya mauti dhidi ya dhambi, vivyo hivyo Balaamu alijua ya kwamba kama angeweza kuwafanya Israeli watende dhambi, Mungu angewashughulikia katika mauti. Kwa hiyo ye ye alipanga njia ya kuwanasa wao waje kushiriki katika dhambi. Alituma mialiko waje katika karamu ya Baali-Peori (mje huku na mwabudu nasi). Basi Israeli, bila shaka, walikuwa wameona karamu za Wamisri kwa hiyo hawakuona kuwa ni vibaya sana kwenda na kuangalia tu na pengine kula pamoja na watu. (Kuna ubaya gani kushiriki haidhuru? Tunapaswa kuwapenda, sivyo, la sivyo tutawezaje kuwavuta?) Kufanya urafiki hakumdhuru ye yote — ama ndivyo walidhania. Lakini wakati hao wanawake wazinzi Wamoabu walipoanza kucheza na kuvua mavazi wakati walipokuwa wanazunguka-zunguka wakicheza dansi na kucheza rumba zao na kujitikisa, tamaa iliwaka mionganoni mwa Waisraeli nao wakaingizwa katika uzinzi ndipo Mungu kwa ghadhabu akawaua elfu arobaini na mbili kati yao.

Na hivyo ndivyo Konstantino na warithi wake walivyofanya huko Nikea na baada ya Nikea. Waliwaalika watu wa Mungu kwenye mkutano. Na kanisa lilipokaa chini kula, kisha likaamka likacheze (likishiriki katika desturi za kanisa, sherehe, na karamu za kipagani zilizopewa majina ya ibada za Kikristo), lilinaswa; lilikuwa limezini. Ndipo Mungu akaondoka.

Wakati mtu ye yote anapoliacha Neno la Mungu na kuijunga na kanisa badala ya kumpokea Roho Mtakatifu, huyo mtu hufa. Amekufa! Hivyo ndivyo alivyo. Usijiunge na kanisa. Usiingie katika madhehebu na kuchukuliwa na kanuni za imani na mapokeo, wala kingine cho chote ambacho hupachukua mahali pa Neno na Roho, la sivyo umekufa. Yote yameisha. Umekufa. Umetengwa milele toka kwa Mungu!

Hivyo ndivyo imekuwa katika kila wakati tangu mwanzo. Mungu huwakomboa watu. Wanatoka nje kwa damu, wakiwa wametakaswa kwa Neno, na kuititia katika maji ya ubatizo na wakajazwa na Roho; lakini baada ya muda mfupi upendo wa kwanza unapoa halafu mtu fulani anapata wazo kwamba yawapasa waunde madhehebu wapate kujihifadhi wenyewe na kujitengenezea jina, basi wanaunda madhehebu tena katika kizazi cha pili na pengine hata kabla ya hapo. Hawana tena Roho wa Mungu, ila tu mfano wa ibada. Wao wamekuwa. Wamejichanganyisha na kanuni za imani na desturi na hamna uhai ndani yao.

Kwa hiyo Balaamu aliwafanya Israeli kufanya uasherati. Je, wajua uasherati wa kimwili ni roho yule yule ambaye hukaa katika madhehebu? Nilisema kuwa roho wa uzinzi ndiye roho wa madhehebu. Na waasherati wote watakuwa na mahali pao katika ziwa la moto. Hivyo ndivyo Mungu anavyowazia juu ya madhehebu. Naam bwana, kahaba na binti zake watakuwa katika ziwa la moto.

Madhehebu si ya Mungu. Hayajawahi kuwa na hayataweza kuwa kamwe. Ni roho mbaya anayewatenganisha watu wa Mungu katika ukasisi na washiriki; na kwa hiyo, basi, ni roho mbaya anayewatenga watu toka kwa watu. Hivyo ndivyo shirika na madhehebu hufanya. Katika kuungana wao hujitenga wenyewe toka kwenye Neno la Mungu, na wakajilingiza wenyewe katika uzinzi wa kiroho.

Basi tazama ya kwamba Konstantino aliwapa watu karamu maalum. Zilikuwa ni zile karamu za kipagani za kale zikiwa na majina mapya yaliyotolewa kanisani, au kwa hali nyinginezo ibada za Kikristo zilichukuliwa na kutumiwa vibaya pamoja na sherehe za kipagani. Alichukua ibada ya mungu wa juu na kuibadilisha iwe ya Mwana wa Mungu. Badala ya kusherehekeea mnamo tarehe 21 Desemba, kama walivyokuwa wakisherehekeea

karamu ya mungu juu, waliiweka iwe Desemba 25 na kuiita siku ya kuzaliwa kwa Mwana wa Mungu. Bali twajua kuwa alizaliwa Aprili wakati ambapo uhai unapotokeza, sio Desemba. Nao walichukua karamu za Astarte na kuziita sherehe za Pasaka ambamo Mkristo anahitajika kusherehekeaa kifo na kufufuka kwa Bwana. Kwa kweli hiyo ilikuwa karamu ya kipagani ya Astarte.

Waliyaweka madhabahu kanisani. Wakaweka sanamu. Wakawapa watu kile walichokiita imani ya mitume, hata ingawa huwezi kuipata katika Biblia. Waliwfundisha watu kuabudu mizimu ambako kunalifanya Kanisa Katoliki la Kirumi kuwa kanisa kuu la yote la ibada ya mizimu ulimwenguni. Kila ndege mchafu alikuwa katika ngome hiyo. Nanyi mnao Waprotestanti na madhehebu yao wakiyafanya mambo yale yale.

Walikula vitu vilivyotolewa sadaka kwa sanamu. Sasa sisemi kwamba hili lina maana kwamba walikuwa wakila hasa vyakula vilivyotoewa sadaka kwa sanamu. Kwa maana ingawa mkutano wa Yerusalem ulikataza vitu kama hivyo, Paulo hakulitilia jambo hilo mkazo sana kwa kuwa alisema sanamu sio kitu. Ilikuwa tu ni jambo la dhamiri isipokuwa tu ambapo lilimkwaza ndugu mnyonge ndipo basi halikukubaliwa. Isitoshe, Ufunuo huu unashughulikia Mataifa wala sio Wayahudi kwa kuwa haya ni makanisa ya Mataifa. Nalionia hili kwa nuru ile ile ninayoyaona maneno ya Bwana, "Msipoula mwili Wangu na kuinywa damu Yangu hamna uzima ndani yenu. Mtu hataishi kwa mkate tu, ila kwa kila neno litokalo katika kinywa cha Mungu." Waweza kuona kuwa kula kwa hakika ni kushiriki katika hali ya kiroho. Kwa hiyo wakati hawa watu walipokuwa wakisujudia sanamu, wakiwashaa mishumaa, wakitumia sikukuu za makafiri, wakikiri dhambi zao kwa wanadamu (ambayo yote ni ya dini ya ibilisi), walikuwa wakishiriki na ibilisi wala sio Bwana. Walikuwa katika ibada ya sanamu wakubali wasikubali. Wanaweza kusema yote watakayo kwamba madhabahu na manukato ni ya kuwakumbusha tu maombi ya Bwana au lo lote wanalodhania yanamaanisha; nao

waweza kusema kuwa wanapoomba mbele ya sanamu ni kwa kutilia mkazo tu; na kwamba wanapoungama kwa kasisi, eti wanafanya hivyo hasa kwa Mungu katika miyo yao, nao wanaposema kwamba kasisi anawasamehe, ni kwamba tu wanafanya hivyo katika Jina la Bwana; wanaweza kusema watakacho lakini wao wanashiriki katika dini inayojulikana sana ya Kibabeli na ya Kishetani, nao wamejiunga na sanamu na wametenda uasherati wa kiroho, ambao maana yake ni mauti. Wao wamekufa.

Kwa hiyo kanisa na taifa vilioana. Kanisa lilijiunga na sanamu. Huku wakisaidiwa na nguvu za serikali walijisikia kuwa sasa, "Ufalme umekuja na mapenzi ya Mungu yamefanyika duniani." Si ajabu kwamba Kanisa la Kikatoliki la Kirumi halitarajii kurudi kwa Bwana Yesu. Wao hawaamini katika ule utawala wa miaka elfu. Wao wana utawala wao wa miaka elfu papa hapa. Papa anatawala hivi sasa na Mungu anatawalia ndani yake. Kwa hiyo atakapokuja, kulingana nao, haina budi uwe ni wakati ambapo mbingu mpya na nchi mpya zimetengenezwa. Lakini wao wamekosea. Papa huyo ni kiongozi wa kanisa la uongo, na patakuwapo na ule utawala wa miaka elfu, ila wakati huo unaendelea ye ye hatakuwamo. Atakuwa mahali pengine.

ONYO

Ufunuo 2:16, "Basi tubu; na usipotubu, naja kwako upesi, nami nitafanya vita juu yako kwa huo upanga wa kinywa Changu."

Aseme nini tena? Hivi Mungu anaweza kuachilia dhambi za hao wanaoliochukua Jina Lake bure? Pana njia moja tu ya kupokea neema katika wakati wa dhambi, TUBU. Ungama umekosea. Mjie Mungu upate msamaha na Roho wa Mungu. Hii ni amri itokayo kwa Mungu. Kutoitii ni mauti, kwa kuwa Yeye alisema, "Nitafanya vita juu yako kwa huo upanga wa kinywa

Changu." Mnyama alifanya vita juu ya watakatifu, bali Mungu atafanya vita juu ya mnyama. Hao waliolipiga vita Neno watakuta Neno wakati mmoja likiwapiga vita. Ni jambo baya sana kuondoa, ama kuongeza kwenye Neno la Mungu. Kwa maana wale walioligeuza, na wakafanya jambo hilo jinsi walivyotaka, mwisho wao utakuwa nini ila mauti na maangamizi. Bali hata hivyo neema ya Mungu inalia, "Tubu." Loo, jinsi mawazo ya toba yalivyo mazuri. Sina cha mkononi, naja tu kwenye msalaba Wako. Naleta huzuni yangu. Natubu ya kwamba mimi niko jinsi nilivyo, na yale nimefanya. Sasa ni damu, ni damu ya Yesu pekee. Itakuwa nini? Toba, ama upanga wa mauti? Ni juu yako.

(Kutoka kwenye *Maelezo ya Nyakati Saba za Kanisa*)

SWAHILI

©1992 VGR, ALL RIGHTS RESERVED

VOICE OF GOD RECORDINGS
P.O. Box 950, Jeffersonville, Indiana 47131 U.S.A.
www.branham.org

Ilani ya haki ya kunakili

Haki zote zimehifadhiwa. Kitabu hiki kinaweza kuchapishwa kwa matbaa ya nyumbani kwa matumizi ya kibinagsi ama kusambaza, bila malipo, kama chombo cha kuitangazia Injili ya Yesu Kristo. Kitabu hiki hakiwezi kikauzwa, kunakiliwa kwa wingi, kuwekwa kwenye mtandao, kuhifadhiwa kikatolewe tena, kufasiriwa katika lugha zingine ama kutumiwa kuomba fedha bila idhini halisi iliyandikwa moja kwa moja kutoka Voice Of God Recordings®.

Kwa habari zaidi ama kwa vifaa zaidi, tafadhali wasiliana na:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org